

之位曰此天皇之位有功者可以處之著貴蒙迎皆弟之謀也以天下讓天皇天皇願讓以弟莫敢即位

又奉白髮天皇先欲傳兄立皇太子前後固辭曰日月出矣而燭火不息其於光也不亦難矣時雨降矣

而猶浸灌○灌下恐有脫字不亦勞乎所貴為人弟者奉兄謀逃脫難照德解紛而無處也即有處者非弟恭之

義弘計宗顯不忍處也兄友弟恭不易之典聞諸古老安自獨輕○中略元年正月己巳朔大臣大連等

奏言皇太子億計聖德明茂奉讓天下陛下正統當奉○奉下恐脫字鴻緒為郊廟主承續祖無窮之烈上當

天心下厭民望而不肯踐祚遂令金銀蕃國群僚遠近莫不失望天命有屬皇太子推讓聖德彌盛福祚

孔章在孺而勤謙恭慈順宜奉兄命承統大業制曰可乃召公卿百僚於近飛鳥入鈞宮即天皇位

日本書紀二十五天豐財重日足姬天皇○皇極四年六月庚戌天豐財重日足姬天皇思欲傳位於中大

兄○天而詔曰云々中大兄退語於中臣鎌子連中臣鎌子連議曰古人大兄殿下之兄也輕皇子○孝

殿下之舅也方今古人大兄在而殿下陟天皇位便違人弟恭遜之心且立舅以答民望不亦可乎於是

中大兄深嘉其議密以奏聞天豐財重日足姬天皇授璽綬禪位策曰咨爾輕皇子云云輕皇子再三固

辭轉讓古人大兄更名古人大市皇子曰大兄命是昔天皇所生而又年長以斯二理可居天位於是古人大兄避

座逡巡拱手辭曰奉順天皇聖旨何勞推讓於臣臣願出家入于吉野勤修佛道奉祐天皇辭訖解所佩

刀投擲於地亦命帳內皆令解刀即自詣於法興寺佛殿與塔間剔除鬚髮披著袈裟由是輕皇子不得

固辭升壇即祚

三代實錄四十五元慶八年二月四日乙未太上天皇○陽成遷御二條院遜皇帝位焉于時天皇在東二

條宮親王公卿奉天子璽綬神鏡寶劍等天皇再三辭讓曾不肯受二品行兵部卿本康親王起座跪奏

曰歷數攸在謳歌是歸昔者漢文三讓雖高猶當大橫之絲遂應代邸之迎伏願陛下在此樂推幸聽於

群臣矣是夜親王公卿侍宿於行在所五日丙申親王公卿引文武百官奉迎天皇即日鸞輿入御東

宮親王公卿扈從